

- राज्य मांय पुलिस ने और बेहतर बणावण सारू साढे तीन सौ करोड़ रुप्या रा खर्च ऊं सरदार पटेल सेंटर फॉर साइबर कंट्रोल अर तकनीकी प्रशिक्षण अकादमी खोली जावेला।
- केंद्र सरकार महिलावां अर बच्चां रा भला ऊं जुड़यो पंखुड़ी नाम रो डिजिटल पोर्टल सरू कीनो।
- जयपुर मांय व्हेवण वाळी सेना परेड रा सिलसिला मांय आज **नो यॉर आर्मी** प्रदर्शनी सरू व्ही।
- फर्जी सरकारी नौकरी घोटाला मांय शामिल गिरोह रे खिलाफ प्रवर्तन निदेशालय राज्य अर आखा देश मांय तलाशी अभियान चलायो।

000

राज्य सरकार पुलिस ने और बेहतर बणावण अर बुनियादी ढांचा विकास सारू 200 करोड़ रुप्या रो खजानो बणावेला। ई सागे ई साढे 3 सौ करोड़ रुप्या रा खर्च ऊं सरदार पटेल सेंटर फॉर साइबर कंट्रोल अर राजस्थान पुलिस तकनीकी प्रशिक्षण अकादमी खोली जावेला। मुख्यमंत्री भजनलाल शर्मा आज जयपुर मांय राखी ज्या पुलिस रा अहलकारां रा राज्य स्तर रा सम्मेलन मांय आ जाणकारी दीनी। वे कहयो के राज्य मांय लारला साल रे मुकाबले अपराधां मांय 15 फीसदी री कमी आई है। मुख्यमंत्री पुलिस रा अहलकारां ने आवता युवा दिवस रे मौके विद्यार्थियां ने पुलिस थाणां रो दौरा करावण अर वां ने नुवा कानूनां री जाणकारी देवण रा हुकम दीना। सम्मेलन रे दौरान ई-विजिटर्स पोर्टल अर ई-जीरो एफआईआर रो सुबीतो सरू करी ज्यो। राजस्थान पुलिस अकादमी ने देश रा सब ऊं बेहतर प्रशिक्षण संस्थान रो दर्जो मिलण परां मुख्यमंत्री पुलिस ने बधाई दीनी। श्री शर्मा पुलिस ने जनता मांय भरोसो कायम करण बाबत् कहयो।

-----

सम्मेलन मांय पुलिस महानिदेशक राजीव शर्मा कहयो के ओ सम्मेलन विकसित भारत थीम माथे राख्यो जा रहयो है।

000

प्रधानमंत्री नरेन्द्र मोदी आज सोमनाथ स्वाभिमान पर्व री सुरूआत रे मौके जनता ने बधाई दीनी है। सोशल मीडिया पोस्ट मांय वे कहयो के स्वाभिमान पर्व भारत माता री वां अणगिणत संतानां ने याद करण रो मौको है, जो सिद्धांतां अर मूल्यां ऊं कदे ई समझौतो नी कीनो। प्रधानमंत्री कहयो के बार-बार हमलां रे बावजूद, भक्तां री अटूट आस्था अर देश रो सभ्यतागत संकल्प सोमनाथ ने बार-बार ओजू बणावणो तैय कीनो।

000

केंद्र सरकार महिलावां अर बच्चां रा भला सारू पंखुड़ी नाम रो नुवो डिजिटल पोर्टल सरू कीनो है। केंद्रीय महिला अर बाल विकास मंत्री अन्नपूर्णा देवी आज नई दिल्ली मांय इण री सुरूआत कीनी। ओ पोर्टल कॉर्पोरेट सामाजिक दायित्व सीएसआर रा तैत गैर-सरकारी संगठनां ने महिला अर बाल विकास विभाग री योजनावां ऊं जोड़बा सारू सिंगल विंडो प्लेटफॉर्म रा तौर ऊं काम करेला।

000

विकसित भारत युवा नेता संवाद-2026 कार्यक्रम काल नई दिल्ली मांय राख्यो जावेला। इण मांय देश भर रा नौजवान नेता विकसित भारत रा नजरिया रा बारा मांय विचार बतावेला। खेल अर युवा मामलात् मंत्री डॉ. मनसुख मांडविया आ जाणकारी दीनी। वे बतायो के ओ कार्यक्रम नौजवानां ने अगुवाई करण, चुनौतियां रो सामो करण अर देश रो भविष्य बणावण रो मजमून तैयार करण मांय योगदान देवण सारू मजबूत बणावेला।

-----

श्री मांडविया कहयो के भारत, दुनिया मांय सब ऊं बत्ता नौजवानां वाळो देश है।

000

राज्य मांय विश्वविद्यालयां रा कुलाधिपति हरिभाऊ बागडे कहयो है के गरीब, पिछाड़ी अर वंचित तबका री जनता ने भणाई-लिखाई रे जरिये ई समाज री मुख्यधारा मांय लाया जा सके है। वे आज बांसवाड़ा रा गोविंद गुरु जनजातीय विश्वविद्यालय रा सातवां दीक्षांत समारोह मांय बोल रह्या हा। श्री बागडे प्राइमरी अर सैकण्ड्री लेवल ताई री भणाई ने मजबूती देवण माथे जोर देता थकां कहयो के विकसित भारत बणावण सारू प्रतिभाशाली व्यक्तित्व व्हेवणो जरूरी है। राज्यपाल विद्यार्थियां ऊं बौद्धिक क्षमता रो विकास करता रेहवण बाबत् कहयो। समारोह मांय राज्यपाल तैतीस हजार तीन सौ उन्तीस विद्यार्थियां ने उपाधियां दे र नवाजा।

000

प्रदेश ने वर्ल्ड-क्लास डेस्टिनेशन इवेंट्स हब बनायो जावेला। उपमुख्यमंत्री दिया कुमारी आज जयपुर मांय राखी ज्या एक कार्यक्रम मांय आ जाणकारी दीनी। वे कह्यो के राज्य री समृद्ध विरासत अर संस्कृति इण ने दुनिया मांय खास पिछाण दिरावे है। उपमुख्यमंत्री कह्यो के राज्य री ऐतिहासिक ठौड़ां विश्व स्तर रा जळसां अर आला दर्जा वाळा सैर-सपाटा रा भविष्य ने नुवो रूप दे रही है।

000

प्रदेश मांय पहली दफा व्हेवण वाळी सेना परेड रा सिलसिला मांय आज जयपुर मांय फौज ने जाणबा री नो यॉर आर्मी प्रदर्शनी सरू व्ही। मुख्यमंत्री भजन लाल शर्मा इण रो उद्घाटन कीनो। ई मौके वे प्रदेश मांय 43 स्कूलां रा नाम शहीदां रा नाम परां राखण रो ऐलाण कीनो। श्री शर्मा कह्यो के राज्य सरकार दूजा विश्व युद्ध मांय भाग ले चुक्या वां फौजियां, ज्यां ने पेंशन नी मिल रही ही अर फौजियां री वीरांगनावां ने मिलण वाळी पेंशन री रकम दस हजार ऊं बधा र 15 हजार रूप्या कर दीनी है।

ई प्रदर्शनी मांय फौज रा टैंक, ड्रोन अर नुवा हथियारां रो दरसाव कर्यो जा रह्यो है। प्रदर्शनी रे दौरान मोट्यारां ने फौज मांय नौकरी रा बारा मांय विगतवार जाणकारी दी जा रही है।

000

फर्जी सरकारी नौकरी घोटाळा मांय शामिल गिरोह रे खिलाफ प्रवर्तन निदेशालय -ई.डी. री ओर ऊं देशभर मांय तलाशी अभियान चलायो जा रह्यो है। निदेशालय रे मुजब ई कथित घोटाळा री जांच रे दौरान 40 ऊं बत्ता सरकारी संगठनां रा नाम सामी आया है। जंगलात महकमा, रेलवे भर्ती बोर्ड, भारतीय डाक, आयकर विभाग, उच्च न्यायालय, लोक निर्माण विभाग, बिहार सरकार, दिल्ली विकास प्राधिकरण, राजस्थान सचिवालय समेत न्यारा-न्यारा महकमा शामिल है। छह राज्यां रा 13 शहरां री 15 ठौड़ां ओ तलाशी अभियान चलायो जा रह्यो है।

000

प्रदेश मांय घणखर ठौड़ां रात री बगत पारो और उतरण ऊं ठण्ड रो असर घणो बध ग्यो है। मौसम विभाग रे मुजब चित्तौडगढ़ अर डूंगरपुर रे अलावा सगळी ठौड़ां पारो 10 डिग्री सेल्सियस ऊं नीचे उतर ग्यो। बीती रात सीकर अढाई डिग्री सेल्सियस तापमान सागे राज्य मांय सब ऊं ठण्डी ठौड रह्यो। राजधानी जयपुर मांय 4 दशमलव 4 डिग्री सेल्सियस तापमान सागे ई सियाळा री सब ऊं ठण्डी रात रही। हनुमानगढ़, गंगानगर, भरतपुर अर अलवर समेत केई ठौड़ां संवारे री पोर घणी धुंअर रही। मौसम विभाग आवता दो-तीन दिन ताई कोहरो व्हेवण रा आसार जताया है।

0000

प्रदेश रा जनजातीय जिला सलूमबर मांय खेती ऊं जुड्या नुवा काम कराया जा रह्या है। म्हाणा खबरनवीस बतायो के हलका रा नौजवान पारम्परिक खेती ऊं हट र नुवा काम कर रह्या है। पेश है म्हाणा खबरनवीस री रपट-

000

पशुपालन और गोपालन मंत्री जोराराम कुमावत जनता ऊं पतंग उड़ावण सारू केवल सुरक्षित सूती डोरा काम लेवण री अपील कीनी है। राज्य सरकार सिंथेटिक सामग्री अर कांच ऊं बण्या डोरा काम लेवण माथे रोक लगा दीनी है। पशुपालन विभाग रा शासन सचिव डॉ. समित शर्मा आ जाणकारी दीनी। वे बतायो के सगळा जिला कलेक्टरां अर पुलिस ने ई हुकम री पालना करडाई ऊं करावण सारू कही ज्यो है। महकमो परिन्दां री बत्ती आवाजाही री बगत संवारे छह ऊं आठ बज्यां ताई अर सिंज्या पांच ऊं सात बज्यां ताई पतंग नी उड़ावण री राय दीनी है। ई सागे ई जख्मी परिन्दां रा ईलाज सारू जिलां मांय खास शिविर ई लगाया जावेला।

000

69 वीं राष्ट्रीय नेटबॉल होड़ आज बाड़मेर जिला रा चौहटन मांय सरू व्ही। 17 साल ऊं कम उम्र रा खिलाड़ियां री ई होड़ मांय देश भर री 25 टीमां रा 300 ऊं बत्ता खिलाड़ी शामिल व्हे रह्या है। आ होड़ 12 जनवरी ने पूरी व्हेला।

000

जैसलमेर मांय 'एक जिला-एक उत्पाद' योजना रा तैत 10 जनवरी ने जिला स्तर री कार्यशाला राखी जावेला। जिला उद्योग अर वाणिज्य केंद्र रा महाप्रबंधक आ जाणकारी दीनी। वे बतायो के इण मांय कारोबारी अर हाथ री कारीगरी रो काम करण वाळां ने एमएसएमई नीति, दिसावर मांय माल बेचण सारू रजिस्ट्रेशन अर जीआई टैग सरीखी योजनावां री जाणकारी दी जावेला।

000